

Na osnovu člana 18.b) Ustava Kantona Sarajevo ("Službene novine Kantona Sarajevo", br. 1/96, 2/96 i 3/96) i člana 20. Zakona o Agenciji za privatizaciju ("Službene novine Federacije BiH", broj 18/96), Skupština Kantona Sarajevo, na sjednici od 3. aprila 1997. godine, donijela je

**ZAKON  
O KANTONALNOJ AGENCIJI ZA PRIVATIZACIJU**

**I - OPĆE ODREDBE**

**Član 1.**

Ovim zakonom osniva se Kantonalna agencija za privatizaciju (u daljem tekstu: Agencija) kao upravna organizacija Vlade Kantona, utvrđuje njen pravni položaj, sjedište, djelokrug i nadležnost, upravljanje, rukovođenje i finansiranje.

**II - PRAVNI POLOŽAJ I SJEDIŠTE AGENCIJE**

**Član 2.**

Agencija ima svojstvo pravnog lica.

Agencija je specijalizovana upravna organizacija Vlade Kantona Sarajevo (u daljem tekstu: Vlada Kantona).

**Član 3.**

Sjedište Agencije je u Sarajevu.

**III - DJELATNOST I NADLEŽNOST AGENCIJE**

**Član 4.**

Djelatnost Agencije je obavljanje stručnih i drugih poslova koji se odnose na privatizaciju.

**Član 5.**

U okviru svoje djelatnosti Agencija vrši naročito:

- organizovanje i podsticanje privatizacije preduzeća na teritoriji Kantona;
- odobrava početne bilanse preduzeća u skladu sa metodologijom za pripremu preduzeća za privatizaciju;
- određivanje provođenja, organiziranja i nadziranja privatizacije preduzeća na teritoriji Kantona;
- zaključivanje ugovora o privatizaciji preduzeća putem prodaje preduzeća, leasinga i drugih metoda;
- organizovanje i podsticanje obrazovanja i stručnog usavršavanja iz oblasti privatizacije;

- pružanje savjetodavne pomoći preduzećima na teritoriji Kantona iz oblasti privatizacije;
- organizovanje i provođenje informativno-propagandne djelatnosti iz oblasti privatizacije;
- obavlja i druge poslove u vezi sa privatizacijom, utvrđene zakonom i drugim propisima i po nalogu Vlade.

#### **Član 6.**

Agencija, u okviru svoje nadležnosti, ima javna ovlaštenja za donošenje pojedinačnih upravnih akata, u skladu sa propisom o općem upravnom postupku.

#### **Član 7.**

Upravni nadzor nad povjerenim javnim ovlaštenjima iz člana 6. ovog zakona vrše nadležna ministarstva, svako u okviru svoje nadležnosti.

U vršenju upravnog nadzora ministarstva iz prethodnog stava, rješavaju po žalbama protiv donesenih upravnih akata u vršenju povjerenih javnih ovlaštenja i vrše druga prava, koja po zakonu ima drugostepeni organ u upravnom postupku.

Agencija je dužna najmanje jedanput mjesečno ministarstvima iz stava 1. ovog člana podnijeti izvještaj o vršenju javnih ovlaštenja.

#### **Član 8.**

U okviru svoje djelatnosti Agencija saraduje sa nadležnim tijelima i institucijama Kantona i drugih kantona u Federaciji Bosne i Hercegovine, Agencijom za privatizaciju Federacije Bosne i Hercegovine, te međunarodnim institucijama i organizacijama.

### **IV - UPRAVLJANJE I RUKOVOĐENJE AGENCIJOM**

#### **Član 9.**

Agencijom upravlja Vlada Kantona.

#### **Član 10.**

Vlada Kantona:

- donosi Statut Agencije i druge opće akte;
- donosi Poslovnik o radu;
- donosi Pravilnik o unutrašnjoj organizaciji Agencije na prijedlog direktora;
- donosi finansijski plan i program rada Agencije na prijedlog direktora;
- donosi završni račun i izvještaj o radu Agencije;
- osniva komisije i radna tijela Agencije;
- vrši i druge poslove u skladu sa zakonom i Statutom Agencije.

#### **Član 11.**

Vlada podnosi izvještaj o radu Agencije Skupštini Kantona Sarajevo, najmanje jedanput u tri mjeseca.

#### **Član 12.**

Agencijom rukovodi direktor.

Direktor ima zamjenika.

Direktora i zamjenika imenuje i razrješava Vlada.

Direktor i zamjenik Agencije imenuju se na period od četiri godine, a nakon isteka ovog perioda mogu biti ponovo imenovani.

#### **Član 13.**

Direktor Agencije organizuje i koordinira izvršenje poslova.

Direktor Agencije u svome radu:

- rukovodi Agencijom;
- predstavlja i zastupa Agenciju;
- odgovara za zakonitost rada, pravilno i zakonito vođenje materijalno-finansijskog poslovanja Agencije;
- odlučuje o zapošljavanju i raspoređivanju radnika;
- donosi pojedinačne pravne akte iz djelokruga Agencije;
- sprovodi odluke, zaključke i upute Vlade Kantona;
- obavlja i druge poslove utvrđene zakonom, Statutom i drugim općim aktima Agencije.

#### **Član 14.**

Statutom Agencije uređuju se naročito:

- osnovna organizacija i način poslovanja Agencije;
- tijela upravljanja i rukovođenja Agencijom;
- zastupanje, predstavljanje i potpisivanje Agencije;
- radnici sa posebnim ovlaštenjima i odgovornostima;
- druga pitanja u vezi sa poslovanjem Agencije.

### **V - FINANSIRANJE AGENCIJE**

#### **Član 15.**

Sredstva za osnivanje i poslovanje Agencije osiguravaju se iz:

- budžeta Kantona,
- dotacije domaćih i međunarodnih organizacija,
- naknada za usluge i drugih izvora.

### **VI - PRELAZNE I ZAVRŠNE ODREDBE**

#### **Član 16.**

Vlada Kantona će donijeti Statut i druge opće akte Agencije u roku od 30 dana od dana stupanja na snagu ovog zakona.

#### **Član 17.**

Vlada Kantona će imenovati direktora i zamjenika direktora Agencije u roku od 15 dana od dana stupanja na snagu ovog zakona.

**Član 18.**

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-13/97

3. aprila 1997. godine Sarajevo

Predsjedavajući Skupštine Kantona Sarajevo, Mirsad Kebo, s. r.